

Rapport dalla seduta dil cussegl da vischnaunca dils 4 d'october 2017 a Danis

A caschun dalla sura numnada seduta ha il cussegl da vischnaunca priu differentas decisiuns.

1. Beinvegni ed avertura

Clau Schlosser arva sco president dalla suprastanza transitorica l'emprema seduta dil cussegl da vischnaunca ed empeila quella entochen ch'il president dil cussegl ei elegius. Suandont quella obligaziun salida e beneventa il president Clau Schlosser, las cusseglieras e tuts cussegliers all'emprema seduta dalla nova vischnaunca fusiunada. El ha grond plascher d'astgar beneventar ils presents. El gratulescha per l'elecziun ed engrazia a tuts per la prontadad da s'engaschar per fatgs communal en in gremi. El selegra e spera sin ina buna collaboraziun e fa attents che la lavur el cussegl seigi da prestar en favur dil beinstar communal. Il president supplichescha da prender serius la lavur da cusseglier e sche pusseivel era prender part a mintga sesida. Mintga cusseglier ei responsabels per las decisiuns pridas el ravugl dil cussegl e quellas decisiuns ein era da purtar dil cussegl. In special beinvegni fa el ad Ursin Fetz dalla HTW ed a Giachen Caduff digl uffeci da vischnauncas. Els dus han fatg part alla cumissiun preparatorica che ha semtgau tier la costituziun.

La gliesta da tractandas, la quala ei vegnida tarmessa tier cun l'invitaziun, vegn suttamessa alla discussiun. Damai ch'ei vegn buca fatg diever da tala, ei la gliesta per la seduta da questa sera ligionta.

2. Elecziun dalla suprastanza dil cussegl per la perioda d'uffeci 2017/2018

a) president dil cussegl

Il vischinadi da Breil fa la proposta d'eleger Maurus Tomaschett sco president dil cussegl. Quella proposta vegn suttamessa alla discussiun ed ei vegn dau la pussevladad da far autras propostas. Da quella pussevladad vegn buca fatg diever ed aschia vegn passau tier l'elecziun.

Cun tscharna unanima vegn Maurus Tomaschett elegius sco president dil cussegl dalla nova vischnaunca fusiunada.

Il president communal gratulescha al nivelegiu president e spera vinavon sin ina buna collaboraziun e surdat il plaid al president gest elegiu.

Il president dil cussegl elegiu engrazia per la confidonza e l'elecziun. El spera sin ina buna collaboraziun cun ils cussegliers ed in cumplein sustegn dalla suprastanza communal. Cun quels plaids passa el alla deliberaziun dallas tractandas tenor gliesta da tractandas approbada.

b) vice-president dil cussegl

Per igl uffeci da vice-president vegn fatg la proposta sin cusseglier Luzi Pfister da Vuorz. Autras propostas dat ei buca.

Cun tscharna unanima vegn Luzi Pfister elegius sco vice-president per la proxima perioda d'uffeci.

c) actuar dil cussegl

Sco actuar propona la suprastanza transitorica il canzlist communal Curdin Cadonau. Cun tscharna unanima vegn el elegius e confirmaus per la perioda d'uffeci.

d) dumbravuschs dil cussegl

Vischinadis e suprastanza han fatg neginas propostas. Per quei vegn dau liber da far propostas. Ord miez dil cussegl vegn fatg proposta sin Marcus Dietrich, Andiastr e Martin Comincioli, Danis. Cun tscherna unanima vegnan els dus elegi sco dumbravuschs per la perioda d'uffeci 2018 – 2021

Il president dil cussegl gratulescha als elegi ed informescha ils presents sur dalla lauvr da parlament en globo. El fa quei cun entgins exempels ord la politica naziunala, cantunala e regiunala. El menziunescha ch'il cussegl hagi grondas cumpetenzas finanzialas. Sper las cumpetenzas finanzialas scufflescha ed approbescha el reglaments da tuttas spartas dil communalessers.

3. Approbaziun constituziun dalla nova vischnaunca per mauns votaziun all'urna

La constituziun ei vegnida tarmessa tier a mintga cusseglier per sepreparar. Dentertemps ha ei aunc dau entginas pintgas correcturas. Ei vegn repartiu in niev sboz cun integrav las correcturas fatgas. Clau Schlosser repassa ils artechels dalla constituziun e menziunescha las midadas enviars las veglias constituziuns. Ursin Fetz dat tier entgins artechels ils scleariments giuridics. Sin las damondas sa vegnir rispiundi.

Duront la deliberaziun dalla fatschenta en detagl, vegnan ils suandonts artechels adattai:

Art. 9 : Parents e quina en lingia directa,

Art. 36: Las votaziuns vegnan fatgas cun maunpli. Ellas ein da far en scret, sch'ina quarta dils presents ni la suprastanza pretenda scrutini. Tier.....

Art. 40 Relasch d'ina lescha da persunal e da salarisaziun..... Quella passascha vegn strihada, cunquei che da niev vegnan tut las leschas decidi dil cussegl. Niev sut d) *Conclus da leschas communalas.*

Art. 41 allinea 2:” Ils commembers da suprastanza astgan buca appartener il medem mument al cussegl da vischnaunca”. Quella passascha vegn strihada. L' exclusiun vegn reglada en ils artechels 9 entochen 11.

Ulteriuras midadas dil text cun caracter redacziunal vegnan integradas.

Cun tscherna unanima approbescha il cussegl da vischnaunca la nova constituziun cun las midadas menziunadas per mauns dalla votaziun all'urna dils 26 da november 2017.

4. Approbaziun lescha da taglia per mauns votaziun all'urna

Il sboz dalla lescha da taglia ei vegnius tarmess tier a mintga cusseglier per sepreparar. Clau Schlosser repassa la lescha e menziunescha las midadas enviars la lescha veglia da taglia dalla vischnaunca da Breil. Il cantun ha medemamein mirav atras nossas adattaziuns. Tier art. 7 dat ei ina pintga midada sin proposta dil cantun. Vinavon vegn giavischau da strihar egl art. 13 ils tgauns per persunas tschoccas e suordas. Quels tgauns ein da niev en la rubrica “tgauns da terapia”, e ston vinavon buca pagar taglia aschiditg ch'els han in certificat ed ein cumprovadamein en acziun. Autras propostas per midadas dat ei neginas. Tier art. 8 vegn aunc spetgau sin ina risposta dil cantun. Sch'ei duess dar ina midada entras il cantun, vegn quella surprida. Schiglioc vegn la versiun actuala surprida per la votaziun all'urna. Aschispert che la risposta dil cantun ei avon maun, vegn il cussegl informaun.

Cun tscherna unanima approbescha il cussegl da vischnaunca la nova lescha da taglia cun quellas pintgas midadas per mauns dalla votaziun all'urna dils 26 da november 2017.

5. Decisiun: piazza supplementara

Clau Schlosser informescha il cussegl sur dalla situaziun dallas piazzas da lavur tier la vischnaunca da Breil. Tier quella informaziun vegn repartiu ina resumaziun dallas piazzas actualas sco era la proposta sco ei savess veser ora naven digl 1 da schaner 2018. Cunquei ch'igl uaul ei bunamein sedublegiaus cun la fusiun ei il pensum dil

selvicultur era alzaus. Per saver fat tut las lavurs egl uaul sco era per il tourismus ei previu da tschentar en ina persuna supplementara.

La discussiun vegn dada libra. Sin las damondas sa vegnir rispundiu. Cun tscharna unanima decida il cussegl da vischnaunca igl augment per ina piazza da 100%.

6. Decisiun: augment pensum da lavur pedela Vuorz e Andiast

Clau Schlosser informescha il cussegl sur dalla situaziun actuala dils pedels dallas vischnauncas d'Andiast e Vuorz. Entochen oz fagievan ils luvrers communal aunc ina cumpart da pedel. Naven digl 1 da schaner 2018 vegnan els dus duvrari cumpleinamein en la gruppa stradala. Ora quei motiv havein tschercau ina nova schligiaziun per omisduas vischnauncas. Cun quella schligiaziun stuess il pensum da lavur dalla pedela vegnir alzaus per 40% sin total 60%.

La discussiun vegn dada libra. Sin las damondas sa vegnir rispundiu. Cun tscharna unanima decida il cussegl da vischnaunca d'alzar il pensum da lavur dalla pedela sin 60% naven digl 1 da schaner 2018.

7. Varia

Robert Veraguth fa la damonda sche persunas d'ordvart astgan separtizipar alla seduta dil cussegl. Ursin Fetz menziunescha che la lescha cantunala prevesa neginas exclusiuns, aschia che la seduta dil cussegl ei publica per tuts.

Clau Schlosser informescha il cussegl, che Martin Candinas, cusseglier naziunal, hagi intervegniu tier la Swisscom pertuccond la reit d'internet en nossa regiun. Per saver informar nua che la reit ei munglusa, vegn giavischau dils cusseglers d'annunziar all'administraziun communal nua els vischinadis che la colligiazion ei fetg schliata.

Maurus Tomaschett engrazia per la preschientscha e la buna e viva discussiun. El siara l'emprema seduta dallas 22.30 uras e giavischa in bien retuorn a casa.

Breil, ils 5 d'october 2017

Il president

Maurus Tomaschett

Igl actuar

Curdin Cadonau